



Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

“SIFAT AMANAH”

28 Januari 2022 / 25 Jamadil Akhir 1443

الْحَمْدُ لِلَّهِ¹ الْقَائِل:

إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ

(Surah An-Nisa' ayat 58)²

Ertinya: Sesungguhnya Allah memerintahkan kamu menyempurnakan amanah kepada yang berhak menerimanya, dan apabila kamu menetapkan hukum di antara manusia hendaknya kamu menetapkannya dengan adil.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَىٰ سَيِّدِنَا مُحَمَّدٍ³ وَعَلَىٰ آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَىٰ يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁴ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Marilah kita tingkatan ketakwaan kepada Allah SWT, dengan melaksanakan segala perintah dan menjauhi setiap larangan Nya; mudah-mudahan hidup kita diberkati Allah, di dunia dan di akhirat. Mimbar pada hari ini akan membicarakan khutbah bertajuk; “SIFAT AMANAH”.

Amanah ialah sifat mahmudah, iaitu sifat terpuji. Lawan kepada sifat amanah ialah sifat khianat. Perkataan ‘amanah’ berasal daripada bahasa Arab, dalam bentuk kata dasar (*amina* - *amanatan*), bererti dapat dipercayai. Terdapat beberapa tafsiran mengenai istilah ‘amanah’. Menurut pandangan seorang tokoh ahli tafsir, Ahmad Musthafa Al-Maraghi, ‘amanah’ ialah sesuatu yang harus dipelihara dan dijaga agar sampai kepada yang berhak memilikinya; sementara Ibnu Al-Araby, mentafsirkan ‘amanah’, ialah segala sesuatu yang diambil dengan izin pemiliknya, atau sesuatu yang diambil dengan izin pemiliknya untuk diambil manfaatnya. Dapat disimpulkan bahawa ‘amanah’ bermaksud menyampaikan hak kepada pemiliknya,

¹ Memuji Allah

² Ayat Al-Quran

³ Selawat ke atas Nabi Muhammad SAW

⁴ Pesan Taqwa



atau tidak mengambil sesuatu melebihi haknya, dan tidak mengurangi hak orang lain. Dalam pengertian nilai dan akhlak, amanah ialah menghargai kepercayaan dengan melaksanakan segala tuntutan yang terkandung dalam kepercayaan yang telah diberikan.

Sidang Jumaat yang dikasihi Allah,

Allah SWT menjanjikan ganjaran pahala yang sangat besar kepada mereka yang berjaya menunaikan amanah. Diceritakan dalam Surah Al-Mukminun, antara orang beriman yang berjaya di akhirat kelak, ialah orang yang menunaikan amanah. Firman Allah SWT:

وَالَّذِينَ هُمْ لِأَمْتِنَتِهِمْ وَعَهْدِهِمْ رَاعُونَ

(Surah Al-Mukminun ayat 8)

Maksudnya: (Telah berjayalah orang yang beriman, antaranya ialah) orang yang menunaikan amanah dan janji mereka.

Sabda Nabi SAW:

إِنَّ الْخَازِنَ الْمُسْلِمَ الْأَمِينَ الَّذِي يُنْفِذُ مَا أُمِرَ بِهِ، فَيُعْطِيهِ كَامِلًا مُؤَفَّرًا طَيِّبَةً بِهِ نَفْسُهُ،
فَيَدْفَعُهُ إِلَى الَّذِي أُمِرَ لَهُ بِهِ، أَحَدَ الْمُتَصَدِّقِينَ.

Maksudnya: Sesungguhnya seorang Muslim penjaga khazanah (orang ramai) yang melaksanakan tugasnya dengan jujur, dan membayar sedekah kepada orang yang diperintahkan oleh majikannya secara sempurna, dengan segera dan dengan pelayanan yang baik, maka ia mendapat pahala yang sama seperti orang yang bersedekah.

(Riwayat Muslim)

Manakala orang yang tidak menunaikan amanah diancam sebagai golongan yang imannya sangat lemah. Sabda Rasulullah SAW:

لَا إِيمَانَ لِمَنْ لَا أَمَانَةَ لَهُ ، وَلَا دِينَ لِمَنْ لَا عَهْدَ لَهُ.

Maksudnya : Tidak ada iman bagi orang yang tidak Amanah dan tidak ada agama bagi orang yang tidak menunaikan janji. (Riwayat Ahmad)

Dalam sebuah hadis lain, Nabi SAW memberi ingatan keras terhadap kalangan pemimpin yang gagal melaksanakan amanah melalui sabda yang bermaksud:

“Sesungguhnya kalian nanti akan sangat berebut-rebut terhadap kepemimpinan, akhirnya hanya penyesalan pada hari kiamat. Di dunia ia mendapatkan kesenangan, namun setelah kematian sungguh penuh derita.” (Riwayat Al-Bukhari)



Sidang Jumaat yang dirahmati Allah,

Ahmad Mustafa Al-Maraghi membahagikan amanah kepada tiga jenis;

Pertama: **amanah manusia terhadap Tuhan,**

Kedua: **amanah manusia terhadap orang lain dan**

Ketiga: **amanah manusia terhadap dirinya sendiri.**

Amanah yang sering diabaikan oleh ramai manusia, ialah amanah terhadap orang lain; antaranya amanah seorang suami terhadap isteri, amanah ibu-bapa terhadap anak, amanah pekerja terhadap pekerjaan, amanah majikan terhadap pekerja, amanah orang kaya untuk membayar zakat, juga amanah pemimpin terhadap rakyat. Sedarilah! Di akhirat nanti, setiap amanah akan disoal oleh Allah SWT. Sabda Nabi SAW:

أَلَا كَلَّمْتُمْ رَاعٍ، وَكَلَّمْتُمْ مَنْسُؤْلًا عَنْ رَعِيَّتِهِ.

Maksudnya: Ketahuilah setiap daripada kamu ialah pemimpin (yang mempunyai amanah), dan setiap daripada kamu akan disoal (di akhirat) tentang orang (yang diamanahkan).

Kisah Khalifah Umar Abdul Aziz, hingga digelar sebagai Khulafa' Rasyidin yang kelima, kerana sifat hebat menjunjung amanah, wajib dijadikan contoh. Ketika hayatnya, Khalifah Umar Abdul Aziz sangat berhati-hati menggunakan harta milik kerajaan, termasuk memadamkan pelita yang menggunakan minyak milik kerajaan sebaik sahaja perkara yang dibincangkan tidak berkaitan dengan urusan kerja. Baginda menolak semua binatang tunggangan mewah milik khalifah sebelumnya, serta menyerahkan hampir seluruh hartanya dan juga harta yang dihadiahkan kepada isterinya kepada negara. Sifat amanah yang diamalkan oleh Baginda telah berjaya mengawal khazanah negara daripada tiris kerana disalahgunakan. Pada era pemerintahan baginda, negara menjadi makmur dan rakyat hidup senang, sehingga tidak ada rakyat yang layak untuk menerima wang zakat. Ketika meninggal dunia, baginda hanya meninggalkan 17 Dinar emas sebagai belanja pengurusan jenazah dan pusaka untuk dibahagikan kepada waris.

Antara contoh lain, pada tahun 1896, Theodor Herzl seorang pemuka Zionis bertemu Sultan Abdul Hamid II, Khalifah Kerajaan Uthmaniah, menawarkan sejumlah wang, bertujuan membeli sebahagian tanah di Palestin untuk dijadikan penempatan orang Yahudi. Beliau menyangka, keadaan ekonomi empayar Uthmaniyyah yang sedang tenat, merupakan masa dan peluang terbaik untuk membeli tanah di Palestin. Walaupun sedang menghadapi hutang



negara yang tinggi, atas sifat amanah yang kukuh, Sultan Abdul Hamid II tidak bersedia menggadaikan bumi Palestin, dan dengan tegas menolak tawaran wang daripada pemuka Zionis tersebut.

Dua contoh ini menyedarkan kita, betapa pentingnya memelihara amanah terutama apabila melibatkan maruah agama, bangsa dan tanah air. Kebiasaannya, amanah boleh tergadai, apabila manusia tewas kepada nafsu dan sifat haloba yang dipengaruhi oleh bisikan syaitan yang dilaknati Allah.

Sidang Jumaat yang dirahmati Allah,

Sifat amanah, terutama dalam kalangan pemimpin amat penting, untuk memastikan kedaulatan sebuah negara merdeka dapat dipertahankan. Dalam titah sempena Majlis Penganugerahan Watikah Pelantikan Anggota Majlis Agama Islam dan Adat Melayu Perak pada 12 Januari 2021, Duli Yang Maha Mulia Paduka Seri Sultan Perak Darul Ridzuan, menzhahirkan peringatan agar umat Islam tidak menyerahkan amanah atau tanggungjawab kepada golongan yang bermoral rendah, terpalit rasuah, salah guna kuasa, tidak amanah dan tidak ikhlas. Insafilah! Pemimpin yang beramanah akan berupaya memakmurkan negara dan menyejahterakan kehidupan rakyat; di sebaliknya negara akan musnah dan rakyat akan sengsara jika para pemimpin mengkhianati amanah.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ
لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ
فَأَسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁵ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا
وَنَبِيَّنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ⁶ وَعَلَى آلِهِ وَأَصْحَابِهِ
أَجْمَعِينَ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁷ وَكُونُوا مَعَ الصَّادِقِينَ.

⁵ Memuji Allah

⁶ Selawat ke atas Nabi Muhammad SAW

⁷ Pesan Taqwa



Kaum muslimin yang dirahmati Allah,

Mimbar menyeru para jemaah agar menginsafi perkara-perkara berikut:

Pertama: Menjunjung amanah yang diberikan dengan memenuhi tanggungjawab sesama insan agar diterima oleh Allah SWT sebagai amal makruf yang dikurniakan ganjaran di dunia dan di akhirat.

Kedua: Bersifat tidak amanah, bererti bersifat khianat. Orang yang melakukan khianat akan disiksa dengan seksaan yang berat di akhirat.

Ketiga: Sifat amanah akan memakmurkan negara dan memajukan bangsa.

Keempat: Sifat khianat akan menyengsarakan kehidupan rakyat, menghancurkan negara dan membunuh tamadun.

Sidang Jumaat yang dirahmati Allah,

Marilah kita secara istiqamah berpegang dengan akidah yang sahih, berterusan beribadat dengan panduan yang sahih dan ikhlas. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁸
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ⁹ وَالْمُؤْمِنِينَ وَالْمُؤْمِنَاتِ وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ
وَاجْعَلْ فِي قُلُوبِهِمُ الْإِيمَانَ وَالْحِكْمَةَ وَثَبِّتْهُمْ عَلَى مِلَّةِ رَسُولِ اللَّهِ ﷺ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالْمِحْنَ وَالْفِتْنَ مَا ظَهَرَ مِنْهَا وَمَا بَطَّنَ عَنْ بَلَدِنَا هَذَا
خَاصَّةً وَعَنْ سَائِرِ بُلْدَانٍ عَامَّةً.

Ya Allah, Jadikanlah kami antara hamba Mu yang memelihara amanah. Kuatkan iman dan hati kami agar menjauhi perbuatan khianat seperti memberi atau menerima rasuah, menyalahgunakan kuasa dan harta benda bukan milik kami untuk kepentingan diri, serta jauhkan kami termasuk golongan yang mengabaikan amanah.

⁸ Ayat Al-Quran

⁹ Doa untuk kaum muslimin



Ya Aziz, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami dalam kalangan hamba-Mu yang amanah, jujur dan ikhlas, serta tegas dan berani menegakkan kebenaran dan melaksanakan keadilan berlandaskan hukum.

Ya Razzaq, berkatilah hamba-Mu yang melaksanakan tuntutan zakat dan sedekah. Kurniai rezeki yang berlipat ganda kepada para pewakaf serta sucikanlah harta dan jiwa mereka, lindungilah golongan *fuqara* dan *masakin* daripada kekufuran dan kefakiran yang berpanjangan.

Ya Malik, kurniakanlah taufik dan hidayah Mu terhadap Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.